



Soras dominicanas da Glion

100 onns ellas missiuns – retro- e prospectiva

GIUSEP CAPAUL/FMR


■ **Quest atun eisi stau 100 onns dapi che las empremas siat soras dominicanas da Glion ein idas ellas missiuns en China. Ual aschi ditg exista era a Glion la Procura da lur missiuns. Sia incarica ei da mirar ch'in cerchel ed amitgs ed amitgas sustegnien finanzialmein las soras missiunaras. Menedra dalla Procura ei Christine Imholz.** La Procura dallas missiuns dallas soras da Glion edescha duas ga ad onn in feigl d'informaziun faldau «berichtet und beleuchtet» – adina era cun ina contribuziun en romontsch. Quel stat quella ga dil ell'enzenna dalla retro- e prospectiva

digl engaschi missiuneric dallas soras da Glion. El center ei la lavur missiunara, resp. ils projects realisai en Brasilia, Taiwan, Filippinas, Irac e Guatemala. Las soras missiunaras da Glion migliuran tras lur agid persistentamein la situaziun humana da viver da paupers affons, giuvenils, dunnas e da tals senza tetg. Ins ei perquei zun engrazievels a fautors e fautors che possibiliteschan cun lur sustegn finansial da realisar tut quei.

Sco quei ch'igl ei stau da spitgar uonn ein era las ovras socialas dallas missiuns el sid stadas mo grevamein e vessamein da realisar pervia dil virus da corona. Tonpli necessarias seigien ussa

las donaziuns. Ils pertuccai san bien grau alla Procura pils daners retscharts en favur d'in project per il nutriment e la higiena pils senza tetg a Manaus en Brasilia. Senza quei agid fussi ei buca stau pusseivel da segidar e spindrar ton-tas vetas. Biars vessen stuiu murir sin via. Ils maletgs dil santeri cun morts da corona a Manaus ein i per igl entir mund entuorn.

Ils davos 100 onns ein cuntegn e senn dallas missiuns semidai fetg. Era per la Procura a Glion ei bia vegniu auter. Il num sez ei denton restaus. Il plaid procura vegn dil latin «procurare» e munta el cass concret: ver quitaun che las soras missiunaras da Glion e lur partenarias e partenaris el sid da nies globus sappien s'engaschar per ina veta cumplenida, oravontut per affons, giuvenils e mummas agl ur dalla societad. In pensum ch'ei buc adina levts da sliigar, mo che dat bia cuntentientscha e gronda satisfacziun.



Quest atun eisi stau 100 onns dapi che las empremas soras dominicanas da Glion ein idas ellas missiuns en China.

FOTO MAD